

EDITORIAL

Armado a rebolusyon ti pudno a solusyon

Ibunbunannag ti agar-ari a sistema ti bukod daytoy a kinabulok iti mapasamak tatta a reaksyunaryo nga eleksyon. Kadagiti napalabas a bulan ti panagkampanya para iti eleksyon iti senado, kongreso ken dagiti lokal a gubyrno, naimatangan ti umili nu kasano a ti eleksyon iti Pilipinas ket dominado dagiti dinastiya ken partido a mangibagbagi iti interes dagiti imperyalista a gangannaet ken sumagmamano, ken saan a ti interes ti mayorya ti umili.

Ti eleksyon 2025 ket pagar-arian dagiti kabulokan a bunggoy ti agar-ari a dasig: dagiti Marcos ken Duterte, nga agpada a napeklan iti korapsyon, panagikuspil ken panangidadanes iti umili, ken iti kina-paspasurot kadagiti diktat ti imperyalista a gangannaet. Ti dua a bunggoy ket aggubgubal tapno maiggeman ti turay iti panggep a palawaen ti kinabaknang da ken burukratiko a pribilehi-

yo ken makalibas kadagiti sungsubatan kadagiti krimen da iti umili.


Gagem ti bunggoy a Marcos a pagarian ti kongreso, senado ken dagiti LGU tapno ad-adda a mapairut ti kontrol iti poder ken parnuayen ti kundisyon para iti panagpaut iti bileg ti dinastiya da labes iti 2028. Ti panangipabalud ken Duterte iti International Criminal Court nu sadinno a nakaisaklang isuna kadagiti krimen laban iti sangkatawan, ket inikkan dalan ni Marcos iti gandat nga idiskaril dagiti karibal na iti pulitika. Agsumsumbangir ti pabuya ken gimik ti rehimen Marcos tapno maala ti nalawa a suporta ti umili. Nupay kasta, mapapaay daytoy a kaluban ti nakaro a krisis ti kinarigat gapu ti awan-sar day a panangngato ti presyo dagiti gagatang, nababa a sweldo ken kinaawan ti pagsapulan.

Agkam-kamat dagiti Duterte a maiserrek ti naan-anay a bilang dagiti tauhan da iti Senado, kangrunaan tapno lapdan ti *impeachment* ken

Vice President Sara Duterte, nga akusado iti naanomalya a panaggastos iti ginasut a milyon a piso a badyet ti gubyrno. Tapno alaen ti simpatya ti umili, parparwaren da nga isuda ket biktima ti pulitikal a panagikuspil ni Marcos. Ngem napaay da a buraen ti sadiwa a lagip ti masa iti nasaknap a kinaranggas ken panagsagaba da iti sidong ti napalabas a rehimen, ken apputen ti pukkaw ti umili para iti hustisya iti amin a biktima ti pasista a krimen ti tirano a ni Duterte.

Ipakpakita ti dominasyon ti dua a bulok a bunggoy iti eleksyon 2025 ti nakadadakes a panagbobotos iti sidong ti malakolonyal ken malapyudal a sistema iti Pilipinas. Daytoy ket balubal ti sumagmamano a nabileg, nu sadinno nga awan ti pudno nga espasyo para kadagiti masa a maddadanes ken magungundawayan. Parparwaren da a ti eleksyon ket demokratiko, idinto a ti kinapudno ket para laeng daytoy kadagiti burukrata kapitalista, burges komprador ken apo't daga.

Kadagiti napalabas a bulan, nangparnuay ti napigsa a tagari ti pannakipaset dagiti demokratiko, progresibo ken patriyotiko a kandidato ken partido iti eleksyon iti senado ken kongreso. Inawit da iti kampanya iti eleksyon dagiti panawagan para iti makabiag a sweldo ken tangdan, pudno a reporma iti daga, pannakaibaba ti presyo dagiti gagatang, libre a serbisyo iti salun-at, edukasyon, trabaho, karbengan, wayawaya ken dadduma pay a kadawatan ti umili. Nagtaud ti kaadwan kadakuada iti intar dagiti manalon ken mangmangged, dagiti na-



kurapay iti syudad, mangngalap, drayber ken dadduma pay a maida-danes a sektor.

Kaniwas daytoy kadagiti reaksyunaryo a pulitiko nga agintutuleng kadagiti pukkaw ti umili. Nu agpostura da man a maka-masa, dayta ket agpatengga iti eleksyon laeng. Babaen ti nauneg a bubon ti kinabaknang da, rimrimbawan da met tattan ti panagbobotos ti party-list ken ik-ikatan da ti lugar dagiti partido a pudno a mangibagbagi iti marigrigat a sektor ti kagimongan.

Ginasut a milyon a piso ti gastos da para kadagiti patalastas iti radyo ken telebisyon, tapno tateken dagiti pader ken poste kadagiti poster da ken agiwaras kadagiti kamiseta a natatakan kadagiti rupa ken nagan da. Kagiddan na, kasla uong a nagsirukat dagiti sarbey tapno impluwensyaan ti panunot ti umili. Kagiddan daytoy ti panagaramat kadagiti mabay-bayadan a para impluwensya iti *social media* tapno iduron ti panagtatalantan pabor iti interes dagiti pulitiko wenno partido. Ginasut a milyon a piso ti sigurado nga aglayus pay bayat nga umadani ti kaaldawan ti eleksyon tapno igatang ti botos.

Agsusumbangir dagiti kaso ti pammapatay ken kinaranggas dagiti agkakaribal a pulitiko iti nadumadu-

ma a paset ti pagilyan. Kinaranggas met ti estado ti us-usaren dagiti ahente ti militar, pulis ken NTF-Elcac tapno lipiten dagiti progresibo a kandidato ken partido, babaen ti surbeylans, panagipila ti pinarbo a kaskaso, panag-aresto ken panagibalud ken pammutbuteng kadagiti pwersa ken tagasuporta da.

Sigurado a balbaliw nga aramaten ti nakatugaw iti turay ti dekompyuter a panagbilang ti botos tapno pumabor kadakuada ti agbalin a resulta ti eleksyon. Isu a pumigpigsang ti panawagan para iti mano-mano a panagbilang ti botos a mangted koma ti dakkel a kinasigurado nga usto a mabilang dagiti botos. Nupay kasta, agtultuloy a saan nga ikaskaso daytoy ti Comelec. Mapatta-patta a dakkel a bilang dagiti migrante a mangmangged a Pilipino ti saan a makabotos gapu iti naaramid nga *online voting*.

Siasinoman kadagiti Marcos wenno Duterte ti agari iti dumteng a panagbobotos, sigurado nga agtultuloy ken ad-adda a pumardas ti pannakabulok ti reaksyunaryo nga estado, iti sango ti awan pannakarisut na a krisis ti agar-ari a sistema. Agtultuloy daytoy nga agipatungpal kadagiti programa ken linteg a pabor iti interes ti imperyalismo a US, ti dadakkel

a gangannaet a kumpanya ken dagiti agar-ari a dasig, a mangitunda ti adadda a panagsagaba ti umili. Sigurado a kumaro pay ti korapsyon iti panangsubbot dagiti burukrata kapitalista ti ginasut a milyon nga inpuonan da iti eleksyon.

Kasapulan nga agtultuloy a patibkeren ti solido nga organisado nga intar ti umili a Pilipino ken agpinget iti dana ti militante a dangadang, nangruna iti panangsango iti dadakkel a laban kadagiti umay a bulan ken tawen, kabilang ti panaglukat ti panagdengngeg ti Senado kanaig iti *impeachment* ni Sara Duterte ken panagusig ken Rodrigo Duterte iti ICC, kasta met ti laban iti uming-inget nga interbensyon militar ti US iti Pilipinas ken panangprobokar ti gera kontra iti China, iti panagpakpakaaso-aso ni Marcos, iti kontra-umili ken parigat a patakaran, korapsyon, kinainutil ken pasista a panagikuspil ken panagatake ti rehimen Marcos iti umili.

Kadagiti napalabas a bulan, nakaad-adu manen ti nailukat ti mata na iti kinabulok ti reaksyunaryo nga eleksyon ken ubbaw a demokrasya iti sidong ti agar-ari a sistema. Ipampamatmat daytoy iti umili a pudno a rebolusyonaryo a panagbalbaliw ti solusyon kadagiti pundamental a problema ti umili. Tuluy-tuloy a pumigpigsang ken lumawlaw ti National Democratic Front ken amin a kameng nga organisasyon daytoy, ken araramiden daytoy ti amin a kabaelan tapno tumulong iti panangpapigsang ti New People's Army (NPA) ken panangiyabante ti armado a dangadang.

Iti kaaw-awayan, agtultuloy nga agpingpinget ken agpappapigsang ti NPA iti laksid ti awan-ressat ken brutal a gera ti panagikuspil ti rehimen Marcos. Agtultuloy a papaunegen ken palpalawaen ti NPA ti panakisilpo daytoy iti masa a mannalon tapno iyabante dagiti anti-imperyalista, anti-pasista ken antipyudal a dangadang da, papigsang dagiti timpuyog ti masa ken iruswat dagiti kabaelan da a taktikal nga opensiba. Iti tarabay ti Partido ken ti tignay panagilinteg, sigurado nga agtultuloy a dalyasaten ti gubat ti umili ti dana ti panagabante.



Tawen LVI No. 9 | Mayo 7, 2025

Ti Ang Bayan ket maipabpablaak iti lenggwahe a Pilipino, Bisaya, Iloko, Hiligaynon, Waray ken Ingles. Agawat ti Ang Bayan kadagiti kontribusyon nga artikulo ken damdamag. Maallukoy met dagiti agbasbasa nga agidanun kadagiti dillaw ken rekomendasyon para iti panagduras ti pagiwarnak tayo.

Linaon

Editorial: Armado a rebolusyon ti pudno a solusyon 1

₱1,200 makabiag a sweldo *nationwide* 3

Kasasaad ti dasig a mangmangged iti ST 4

Kabankalan 7, nasasayaat nga annak ti Negros 5

Maika-52 anibersaryo ti NDFP, narambakan 5

Ti saan nga agkupas a suporta ti masa 6

Baro a kumand ti AFP, pwersa ti US iti Pilipinas 7

Iti ababa a sarita 8

Doktrina a CVE ti US, ar-aramaten ti NTF-Elcac 9

Dagiti protesta 9

Dua a lider-masa iti ST, nadukot 10

Ti Ang Bayan ket ipabpablaak ti Komite Sentral ti Partido Komunista ng Pilipinas dua a daras iti tunggal bulan

 ang.bayan@cpp.ph

₱1,200 a makabiag a sweldo *nationwide*, panawagan iti Mayo 1

Nasurok 7,000 mangmangged, kabilang dagiti kabataan ken dadduma pay a demokratiko a sektor, ti nagmartsa agturong ti Mendiola idia y Manila idi Mayo 1, Aldaw ti Tegged. Immawag da nga ingato ti sweldo iti makabiag a tukad iti intero a pagilyan. Adda met ti kapada a tignay kadagiti syudad ti Baguio, Angeles, Calamba, Naga, Cebu, Iloilo, Roxas, Bacolod, Davao, ken iti ili ti Rosario idia y Cavite.



Segun kadagiti mangmangged, rumbeng nga ingato ti minimum a sweldo iti makabiag a tukad a ₱1,200 gapu iti ngumatngato a balor ti panagbiag ken mano a dekadang a mapawpawilan ti panagnagato ti sweldo. Iti agdama, adda iti 6% agingga 54% ti maaw-awat a sweldo dagiti mangmangged kumpara iti pagkasapulan da. Inrupir da a was-wasen dagiti *regional wage board* a mangit-ited ti barya-barya a panagnagato. Panawagan da met ti panangisardeng iti kontraktwalisasyon ken panangsalaknib iti karbengan iti unyon, karaman ti karbengan iti panag-organisa ken kolektibo a pannakitinnawar.

₱200 *across-the-board*

Kagiddan ti panawagan a makabiag a sweldo, induron ti National Wage Coalition (NWC) ti pannakaisapasa a linteg ti ₱200 nayon a sweldo tapno dagus a maikkan ti bang-ar dagiti mangmangged. Iyab-abante ti koalision ti gakat iti sango ti manon a tawen a pannakaitantan dagiti gakat a nayon a sweldo iti Kongreso ken Senado. Nu maiduron, daytoy ti umuna a nailyan a panagnagato ti sweldo a maidalan iti linteg iti napalabas a 36 tawen. Ti NWC ket buk-buklen ti 30 a sentro ti tegged, kabilang ti KMU.

Kas ti namnamaen, inulit laeng ni Ferdinand Marcos ti sungbat a "pagadalan" ti gakat a nayon. Kabalikad daytoy iti kinapaspas ti panangipasa ti rehimen ti ehekutibo a mandato a nangnayon ti ₱200 iti

inaldaw nga alawans kadagiti soldado ken pulis tatta a tawen.

Diskriminasyon iti sweldo iti kaaw-awayan

Makabiag a sweldo met ti awag dagiti mangmangged iti agrikultura iti Aldaw ti Tegged. Segun iti Unyon ng mga Manggagawa sa Agrikultura (UMA), nu nababan ti sweldo iti kasyudadan, nababbaba pay ti sweldo dagiti mangmangged-talon iti laksid ti napateg a papel da iti produksyon ti taraon.

Arig na "third class citizen" wenno nababbaba a klase ti umili dagiti mangmangged iti kaaw-awayan, segun iti UMA. Idia y Eastern Visayas kaspangarigan, adda iti ₱390 laeng ti sweldo dagiti mangmangged iti agrikultura, a 32.5% laeng ti makabiag a sweldo. Idia y Negros, nu sadinno a masarakan ti dadakkel nga asyenda, rinibo a mangmangged-talon ti nakagalut iti sistema ti pakyawan a nababbaba pay iti naikeddeng a minimum a sweldo ti maaw-awat dagiti mangmangged iti agrikultura.

Nayon iti barat a sweldo, sumangsango da met kadagiti saan a makatao ken napeggad a kundisyon iti trabaho. Masansan a maisarsarang da kadagiti napeggad a kemikal, nakaro a pudot ti aldaw ken dadduma pay a sitwasyon a makapadakes iti salun-at.

Karit kadagiti mangmangged a Pilipino

Iti pablaak ti Communist Party of

the Philippines iti Aldaw ti Tegged, inallukoy daytoy dagiti mangmangged a Pilipino nga agkaykaysa ken agtignay tapno agserbi a natibker a bugas, nalawa a pwersa ken daulo iti dangadang ti umili a Pilipino para iti wayawayaya ti pagilyan ken kagimongan.

Kasapulan nga iyabante dagiti militante a dangadang ti unyon tapno ilaban ti makabiag a sweldo, ken salakniban ti demokratiko nga interes ken pagimbagan dagiti mangmangged, kuna daytoy. Nasken a pangiggeman ken usaren ti welga kas armas kadagiti pang-ekonomya ken pangpulitika a dangadang da.

Kuna ti Partido, rumbeng nga ikabil dagiti mangmangged a Pilipino ti intar da iti unaan dagiti dangadang ti umili, kabilang iti panaglapan iti korapsyon ti agar-ari a rehimen, dagiti pasista a krimen, awan-saraday a panagnagato ti presyo dagiti gagatangen ken saan a naikalintegan nga importasyon ti bagas. Kasapulan a paawengen ti panawagan para iti pudno a reporma iti daga, nailyan nga industriyalisasyon ken nailyan a demokrasya.

Nasken met a labanan ti Balikatan ken dagiti *war games* a pangpamparnuay ti gera ti US ken ti panagpakpakaaso-aso ti rehimen Marcos iti imperyalista nga amo na. Nagpanawagan met daytoy kadagiti mangmangged a Pilipino nga ipakita ti pannakikaykaysa iti umili a Palestino laban iti henosidyo ti Zionista nga estado ti Israel.

Kasasaad ti mangmangged idiyay Southern Tagalog

Masarakan ti kadakkelan a bilang dagiti mangmangged a Pilipino idiyay Southern Tagalog. Iti kabuklan, 18% ti intero a pwersa ti tegged ti pagilyan ti adda iti rehiyon. Maikadwa ditoy ti National Capital Region nu sadinno a bumilbilang iti 10.4 milyon dagiti mangmangged. Nakakonsentra iti Calabarzon ti 12.1 milyon iti 14.2 milyon a pwersa ti tegged ti rehiyon.

Saan pay a karaman ditoy ti saan nga ibilbilang ti estado a pwersa ti tegged kas kadagiti agtagibalay, retirado, *out-of-school* a kabataan, nagturpos ngem awan ti mastrekan a trabaho, addaan rangkap ken dagiti saan a nagsapul ti trabaho iti uneg ti innem a bulan. Iti kaudian nga inruar a survey ti reaksyunaryo nga estado, ti "labor force participation rate" wenno porsyento ti populasyon ti edad 15 agpangato a mairamraman iti pwersa ti tegged ket 64.8% laeng iti Calabarzon ken 64.2% iti Mimaropa.

Kadagiti addaan trabaho, apagkatlo ti nakategorya a self-employed wenno agiyem-employo iti bukod na. Malaksid ditoy, adda 7% a maibilbilang iti *employed* ngem awanan sweldo wenno saan a mabaybayadan ti tegged na. Nu pagtipunen ti dua a kategorya, 35% daytoy ti pwersa iti tegged nga addaan bilang a 3.2 milyon iti intero a rehiyon. Nu inayon daytoy iti upisyal a bilang ti awanan trabaho, adda ti makapasidduker a bilang a 3.7 milyon nga awanan pormal a pagsapul iti intar ti 9.2 milyon a pwersa iti tegged ti Southern Tagalog. Nayan kadakuada ti adda iti 1.4 milyon a mangmangged nga *underemployed* wenno kurang iti trabaho.

Nababa a sweldo

Ti tinangdanan ken agsusweldo a mangmangged iti rehiyon ket mangbukbukel iti 64% ti pwersa ti tegged nga addaan trabaho. Adda iti pribado a kumpanya ti 4.4 milyon, bayat nga empleyado ti guberno ti 777,000.

Nakababbaba ken saan a makabiag ti pamilya ti tangdan nga ibaybayad ti kapitalista ken burukrata kapitalista kadagiti mangmangged, iti

pribado man wenno iti sektor publiko. Iti Calabarzon, ti minimum a tangdan idi Mayo 2024 ket ₱522 laeng iti tunggal aldaw idinto a ti naikeddeng a makabiag a tangdan para iti 5-katao a pamilya ket ₱1,122 tunggal aldaw. Idiyay Mimaropa, makapaasi a ₱352 tunggal aldaw ti minimum a tangdan idi Marso 2024, adayo iti naikeddeng a makabiag a tangdan para iti 5-katao a pamilya a ₱1,213. Aglanglanga a patakaran ti reaksyunaryo a guberno ti saan a makatao a sapul ti mangmangged.

Minilyon dagiti mangmangged ngem bassit a bilang laeng ti organisado kadagiti unyon a kangrunaan nga organisasyon a mangiyabante iti karbengan da iti nainkalinteg a sweldo. Iti rekord idi 2021-2022, iti kabuklan a bilang a 34,543 kumpanya iti pagilyan nga addaan kababaan a 20 mangmangged agpangato, 1,464 kumpanya wenno 4.2% laeng ti addaan rehistrado nga unyon. Basbassit daytoy iti dati a 6.3% idi 2018.

Terorismo ti sungbat ti rehimen iti panaglaban ti dasig a mangmangged

Ti sigud a pasista a panangipawil iti panagunyon dagiti mangmangged ket inartapan pay ti agdadata a terorismo ti estado babaen ti pannakai-pasa ti linteg nga Anti-Terrorism Law. Ti reaksyunaryo nga estado ti agiyar-aramid ti terorismo laban iti kadawyan nga umili nangruna laban kadagiti mangmangged, aktibista, dagiti tao nga addaan nainkalinteg nga adbokasiya ken dagiti kritiko ti guberno. Nasaknap nga ar-aramaten dagiti militar, pulis ken ahensya ti



estado kas ti NTF-Elcac ti *Red-tagging* a mangpunpuntirya kadagiti lider ken aktibista a kameng ti unyon. Panagsagana daytoy tapno ipatungpal ti pammapatay, panagdukot ken panangpukaw kadakuada. Nalatak nga ehemplo daytoy ti operasyon ti PNP-Calabarzon a naawagan a *Bloody Sunday* idi Marso 7, 2021 a nangpapatay iti siyam a lider ken organisador kabilang ti lider-mangmangged a ni Manny Asuncion. Kalpasan ti sumagmamano a lawas, pinapatay da met ni Dandy Miguel, presidente ti unyon iti Fuji Electronics idiyay Laguna.

Idi nasapa a paset ti 2023, mayasa a delegasyon ti International Labour Organization (ILO) ti nagiyaramid ti imbestigasyon iti kasasaad dagiti unyon ken nagiyebkas ti panangkundenar iti taray ti kapanunotan ti reaksyunaryo a guberno a kanayon nga isilsilpo daytoy ti unyonismo iti komunismo. Manipud 2016, 76 unyonista ken organisador ti naimalidit a pinapatay dagiti pwersa a pangseguridad ti estado. Uray kalpasan ti misyon ti ILO iti pagilyan, uppat pay nga unyonista ti naiyulat a napapatay.

Naadaw iti Kalatas, Mayo 2025.

AB

Kabankalan 7, nasasayaat nga annak ti Negros Island

Pinadayawan ti Communist Party of the Philippines ken New People's Army (NPA) Negros Island (Apolinario Gatmaitan Command) ti pito a Nalabbaga a mannakigubat daytoy a napapatay iti "overkill" nga armado nga operasyon ti Armed Forces of the Philippines (AFP) idi Abril 27 ti agsapa idia Ba-rangay Tapi, Kabankalan City, Negros Occidental. Pimmusay ti Kabankalan 7 bayat nga umak-akem da ti nabalitokan a rebbe-ngen ti agtultuloy a panangiyabante ti armado a dangadang, panagpalawa iti base a masa ken agraryo a rebolusyon iti isla.

Ti pito a namartir ket da Reniel Locsin Cellon (Ka Randy), Mary Jane Magquilat (Ka Shonie), Charity Amacan (Ka Ma-yang), Johnrey Mejares (Ka Jai), Glenda Tinio Mejares (Ka Glendyl), Ka Pitong ken Dee Supelanas (Ka Dahlia). Ni Supela-nas ket dati a lider estudyante ti UP-Cebu. Tallo kadagiti mar-tir ket *senior citizen* ken addaan kundisyon a medikal a maka-gapu ti kinarigat da nga agtignay.

Idi Abril 29, nagtitipon ken sangsangkamaysa a nagitugkel ti kandila dagiti kabataan a Cebuano iti University of the Phi-lippines (UP)-Cebu tapno padayawan ni Supelanas. Sakbay a nagserbi isuna kas Nalabbaga a mannakigubat, ni Supelanas ket maysa nga aktibista ken lider-estudyante. Indauluan na dagiti kampanya para iti edukasyon, serbisyo iti gimong, de-mokratiko a karbengan ken panaglaban iti tiraniya ken pasis-mo.

Nagidanon ti pannakipagrikna ti Partido ken NPA-Negros Island kadagiti pamilya, gagayyem ken kakadwa ti Kabankalan 7. "Bayat nga agladingit, aramaten yo daytoy a gundaway tapno ad-adda a tenneben ti rebolusyonaryo a pakinakem, kas pamuspusan ti pananggun-od ti hustisya kadagiti martir tayo," segun ken Ka Marco Valbuena, upisyal iti impormasyon ti Par-tido.

Binabalaw met ni Valbuena ti panangtagibassit ti National Task Force-Elcac ken AFP iti lagip ni Supelanas. Ipinpinta dagi-ti pwersa ti estado nga isuna ket "biktima ti manipulasyon" ti Partido ken ti NPA, iti laksid ti kinapudno a rinibo a kabataan ti nakipaset ken makipaset pay iti rebolusyonaryo a tignay tapno baliwan ti bulok a kagimongan gapu iti panagayat da iti ina a pagilyan.

Kabayatan na, immawag ti imbestigasyon ti grupo iti kar-bengan-tao a Kapatid iti pammapatay iti Kabankalan 7. Idur-duron da ti imbestigasyon gapu ta agdudua da nu "pudno nga-ta nga engkwentro a militar ti napasamak wenno naigagara a pammapatay." Masmadaaw ti grupo nga awan man laeng uray maysa ti nakalasad kadagiti pito a Nalabbaga a mannaki-gubat.

Kuna ti grupo, bin-ig a napigpigs a ken superyor ti bilang ken armas ti AFP laban kadagiti nakaistasyon a Nalabbaga a mannakigubat, ngem apay a saan da laengen nga inaresto ko-ma isuda? "Apay a pulos nga awan kadakuada—wenno amin da koma—ti naaresto ken napilaan ti kaso? Tapno agbalin da a balud pulitikal imbes nga agnanayon a pinagulimek da dagi-toy?" segun pay iti grupo.

AB

Maika-52 anibersaryo ti NDFP, narambakan

AWIT DAGITI bandera ti National Democratic Front (NDF) ken dagiti alyado nga organisasyon daytoy, nagiruswat ti rali nga apagdarikmat ti gi-nasut a kameng ti nadumaduma a rebolusyonaryo a grupo iti Divisoria idia Manila idi Abril 29 tapno rambakan ti anibersaryo ti NDFP. Panawagan da: "Armado a rebolusyon ti pudno a solusyon!" Lina-gip ti NDFP ti maika-52 anibersaryo daytoy idi Abril 24.

Nagisab-it kadagiti istrimer ti Christians for National Liberation (CNL) ken Revolutionary Council of Trade Unions (RCTU) asideg iti Ma-lacañang nga addaan panawagan ti panangiyabnte ti rebolusyon.

Segun ken Elias Dipasupil, kabuklan a kalihim ti NDFP, ti NDFP kas organisasyon ti nagkaykaysa a prente ket para iti rebolusyonaryo nga armado a dangadang. "Bayat a mabigbig ti nadumaduma a porma ti pannakidangadang, itantandudo ti NDFP ti armado a dangadang kas kangrunaan a porma tapno maduprak ti bulok a malakolonyal ken malap-yudal a sistema bayat nga in-inot ken tuluy-tuloy a mabukbukel ti baro a sistema iti panangpadur-as kadagiti organo ti bileg iti pulitika iti kaaw-awayan.

Inallukoy na dagiti alyado nga organisasyon nga agpalawa ken agpapi-gsa. "Iti agdama a sanga-lubongan ken nailyan a krisis, kasapulan la unay dagiti organisasyon ti masa para iti pannakidanga-dang ti umili a Pilipino laban iti panangidadanes ken pananggundaway ken iti panangbukel ti kagi-mongan a rumbeng a para kadakuada, nga agser-serbi iti interes da," kuna na.

Nagipeksa met ti kablaaw ti nadumaduma nga organisasyon manipud iti tukad rehiyon agingga nailyan, ken dagiti partido iti ballasiw-taaw para iti anibersaryo ti NDF. Kabilang ditoy ti CPP, NPA, da-giti balangay ti NDF iti Southern Tagalog ken Ilocos, NDF-Palawan, NDF-International, Liga ng Agham para sa Bayan, Makabayang Kilusan ng Ba-gong Kababaihan, RCTU, Kabataang Makabayan ken KM-Southern Tagalog, Compatriots, CNL ken Pambansang Katipunan ng mga Magbubukid.

Ti NDF ket kinablaawan met ti Friends of the Filipino People in Struggles (FFPS) ken dagiti bala-ngay ken organisasyon daytoy. Nagiyaramid ti FFPS kadagiti aktibidad ken panagtutipon iti nadumadu-ma a pagilyan idi Abril 26 kas panagrambak. Nagi-danon met ti kablaaw ti International Bureau ti



Communist Party of Turkey (TKP-ML) ken Cairde na Filipínigh Committee ti Anti-Im-perialist Action Ire-land.

Ti saan nga agkupas a suporta ti masa

Sardamen idi napan dagiti kakadwa iti maysa a kalapaw ti aguuway wenno agal-ala ti uway a ni Manong Nestor (saan a pudno a nagan na) iti bennat ti Ilagan-Divilacan Road. Adda iti igid-kalsada ti kalapaw isu nga inuray da laengen ti panaglennek ti init sakbay nga agturong idia.

"Naimbag a rabii!" kagiddan ti paga't lapayag nga isem ti dagus nga inpasabat dagiti kakadwa kenkuana. Saan da pay laeng a nakastrek iti kalapaw ket dagusen a nagsangit ni Manong Nestor ken "Kadwa!" ti kay-kaysuna a naisawang na bayat nga agsangsangit latta. Rimwar ni Manong Nestor tapno asitgan dagiti kakadwa ken nairut nga inarakup na isuda. "Nagbayagen a saan kayo a nakapasyar. Nagbayagen nga ur-urayen dakayo," maragragasakan a nakunana bayat a paspastreken na dagiti kakadwa iti uneg ti kalapaw.

Maysa ni Manong Nestor kadagiti nailyan a minorya nga Agay idia Kadas (saan a pudno a nagan ti lugar) a naagawan ti daga iti nagan ti ubbaw a reporestasyon nga Enhanced National Greening Program (E-NGP). Saan metten a makauma isuna gapu iti panangiparit ti DENR. Kas ti amin a nailyan a minorya a napaidaman ti ansestral a daga, awan ti bukod na a daga isu a ti panagala ti uway ti nagbalin a pagbiagan da nga agassawa. Numanpay ipan da amin a pigsa da iti panaguway, nakabasbasit latta ti masapsapulan da tapno mailasat ti inal daw a pagkasapulan ti pamilya.

"Saanak a nakaadal. Saan ko nga ammo ti agbasa, agsurat ken agbilang ngem nagagetak nga agrabaho. Ngem uray ibukbok mi nga agassawa ti amin a ling-et ken dara mi iti panaguway, kanayon kami latta a makurkurangan ken masansan a malugi gapu ta nakaad-adu ti ikiskissay ti boss mi (iti panaguway)," panangibinglay ni Manong Nestor iti narikut a kasa-saad da kadagiti kakadwa, bayat nga ik-ikkan na isuda ti napudot a kape. "Isu a nakaragragasakak a nakasubli kayo ditoy ayan mi, kakadwa," na-

kaisem a kunana.

Narikut ti proseso ti panaguway.

Malaksid nga adu ti siit daytoy ken narigat a guyuden manipud iti puon na wenno ulyen tapno maala a sibubukel ti uway, mano-mano pay a maisalsalog manipud iti kabakiran. Kasla nuang a mangguyguyod ti arado, ipan da amin a pigsa da a guyuden ti mano a pidaso ti uway a nagalut iti siket wenno ulo da agingga a makagteng da kadagiti kalapaw. Isu a sakbay da pay a makaala ti uway, bumalbale dan tapno adda ti igatang ti taraon ti pamilya ken balon iti kabakiran bayat nga aguw-uway, nayon pay ti barat a panagpresyo iti tunggal reppet ken "pole" wenno murdong ti uway segun iti kadakkel daytoy. Ken gapu ta saan da a makabasa ken makabilang, masansan ket masasaur da iti kwentaan.

Panagtittinnulong ti hukbo ken masa

Nabaknang iti rebolusyonaryo a kapadasan ken sangsangkamaysa a panagtignay dagiti mannalon ken nailyan a minorya iti baryo ti Kadas. Tawen 2000, timmaud ti isu iti lugar idi ginandat ti mangimatmanton ti Community-based Forest Management a pagtalawen dagiti mannalon. Sigud daytoy nga addaan konsesyon iti panagtroso iti erya iti dandani sangaribo nga ektarya. Idi nabayag a nabakante ti konsesyon ket nagpwesto ditoy dagiti setler manipud iti Ifugao.

Iti panangidaulo ti Partido, balligi a nairupir dagiti mannalon ti karbengan da nga agsukay iti taltalonen da a daga. Iti proseso ket napadur-



as ti lugar da kas makonkonsolida a paset ti base a gerilya. Adda dagiti organisasyon a naitakder ken dagiti proyekto a sosyo-ekonomiko kas kadagiti komunal a talon iti sektor ti kabataan, babbai, dagiti panglakayen wenno natataengan ken dagiti panday; adda dagiti ramit a pangtalon ken panangpadur-as ti sistema ti nadalus a danum ken dadduma pay a proyekto para iti pagimbagan dagiti mannalon ken panangpangato ti produksyon. Numan pay agtultuloy a saan a bigbigen ti reaksyunaryo a gubyerno ti karbengan da iti daga gapu iti kategorya a *forest land* kano daytoy, kabinnadang dagiti kaasideg nga ili ket sangsangkamaysa da a sinango ken naipagballigi dagiti pakaseknan da a mannalon iti lugar.

Dagiti proyekto a managkamkam ti daga

Nangrugi a mariribuk ti nasayaat a panggep dagiti mannalon idi simrek dagiti ubbaw a programa ti reaksyunaryo a gubyerno a nangpadisi iti pinullo a komunidad dagiti nailyan a minorya nga Agay, dagiti setler manipud Ifugao ken kabangibang a barangay. Daytoy ti NGP ken ti konstruksyon ti Ilagan-Divilacan Road para kano iti ekoturismo a mangsilpo iti sentro ti Isabela kadagiti ili iti igid-baybay. Doble a basnut dagito nga iskema ti panangagaw ti daga kadagiti katutubo a mapapaidaman ti karbengan iti daga ken pagbiagan.

Iti sidong ti dati a rehimen Be-

Suruten iti panid 7

Panangingato ti panagsagana ti US iti imperyalista a gera laban iti China

Iti kangitingitan dagiti aktibidad ti Balikatan idi Mayo 1, inyanunsyo ti AFP ti plano daytoy a panangitakder ti "Strategic Defense Command" ita a tawen. Buklen daytoy ti baro a kumand tapno kano imatonan ti ginasut a war games nga isaysayangkat ti US iti Pilipinas, kabilangen ti Balikatan. Daytoy a kumand ket kunkunada a maadaw manipud iti agdama nga Education, Training and Doctrine Command ti AFP a datin a nairut a nakapasurot kadagiti doktrina a militar ti US.

Kagiddan ti panangbukel ti baro a kumand ti AFP, rugyan ti US tatta a tawen ti operasyon dagiti baro a yunit militar daytoy iti Pilipinas. Immunan a nangrugi ti operasyon ti Littoral Rotational Force Luzon ti US a permanente a dumket iti amianan a paset ti isla.

Ti panangbukel ti AFP ti Strategic Defense Command ken panangituding ti permanente nga LRF iti Pilipinas ket paset ti mapapainget a panagsagana ti US ti gera laban iti China. Agtultuloy a papairtengen ti US ti tensyon a militar iti baet daytoy ken ti China iti naigagara a panangiyaramid ti dadakkel a war games iti asideg ti Taiwan, panagipwesto idia kadagiti long-range ken anti-ship missile system a nakapaturong iti mainland China ken panagi-

deploy kadagiti tropa ken war ship iti lugar a nakaas-asidegen iti Taiwan ken iti pagaapaan a pormasyon iti South China Sea. Tuluy-tuloy ti panagitambak ti ginasut nga armas, lugluga ken dadduma pay nga usarmilitar iti nadumaduma a lokasyon iti Pilipinas.

Protesta kontra-Balikatan

Sinabat ti demonstrasyon dagiti nailyan-demokratiko a grupo ti panaglukat ti Balikatan 40-25 idi Abril 21. Binabalaw da daytoy kas nagastos ken saan a pagnumaran dagiti Pilipino. Kunada, panangrabngis daytoy iti soberanya ti pagilyan.

Iti dandani 3-lawas a Balikatan, naimaldit ti presensya ken aktibidad militar ti US ken dadduma pay a gangannaet a pwersa idia Batanes,

Cagayan, Zambales, Subic Bay, Bulacan, Nueva Ecija, Aurora, Cavite, Palawan, Manila City ken Quezon City. Naiyaramid met dagiti maniobra a panggubat iti teritoryo a pangtangatang ken kabaybayan iti Philippine Sea ken South China Sea.

Nadiskaril dagiti aktibidad militar ti Balikatan saan laeng ti talinaay kadagiti komunidad, nu di ket ti pagbiagan ti nakukurapay a mangngalap ken mannalon.

Idia Aparri, Cagayan, naiyatnag ti panangiparit nga aglayag kadagiti mangngalap idi Mayo 3-4 para iti Counter Landing Live Fire. Dumananon iti 15,000 a nakarehistro a mangngalap ti naperwisyo ti panangiparit.

Idia Zambales, naiyatnag met ti panangiparit nga aglayag idi Abril 25-27 kadagiti ili ti San Antonio, San Narciso, San Felipe, Cabangan, Botolan ken Subic. Balbaliw a naipatangpal daytoy idi Mayo 5-6.

Numan pay agingga Mayo 9 laeng ti Balikatan, agbayag pay dagiti tropa nga Amerikano para kadagiti kasilpo daytoy nga aktibidad. **AB**

Manipud iti panid 6

nigno Aquino III, nairuswat iti intero a pagilyan ti National Greening Program kabilang iti syudad ti Ilagan idi 2011-2012. Ad-adda pay a napasaknap daytoy iti sidong ti rehimen Duterte a nagbalin nga E-NGP.

Napigsa ti panagsupyat ti masa nga agindeg kadagidiay a lugar. Ngem ti naranggas ken napaut nga operasyon ti 86th IB, 502 IBde iti sidong ti direktiba ken panangidaulo ti 5th ID, saan a nabaalan ti masa a mannalon nga agtalinaed. Napadisi dagiti mannalon ken nailyan a minorya a naatalan ti nasao a proyekto. Napapanaw amin nga agnaed iti igid-kalsada, ken naikabil isuda iti maymaysa a lugar nu sadinno a bulnerable da latta a mapatalaw. Dagiti dayo a babaknang ti simmublat a

nagpwesto iti sigud a komunidad da iti pananggato ti balor ti daga iti igid ti kalsada.

Gapu ditoy, kolektibo a nagtignay dagiti mannalon, nailyan a minorya ken setler, a nagtungpal iti mano a serye a mobilisasyon, iti tulong ken pannarabay dagiti kakadwa. Nagisayangkat met kadagiti aksyon militar dagiti yunit ti hukbo kabilang ti panagdis-arma ken reyd. Daytoy nga isyu, kasilpo ti nasaknap a panagpadisi ti NGP kadagiti settler, panagkamkam dagiti tradisyunal nga apo't daga ken panangpatalaw ti lokal nga reaksyunaryo a gubyrno iti umili tapno wayaan dagiti ubbaw a proyekto ti panagdur-as, ti nagbalin a batayan ti militante a panagtignay ken dangadang ti masa iti Kadas ken

kabangibang nga il-ili.

Gubuay ti nabaknang a rebolusyonaryo a kapadasan iti pannakidangadang dagiti masa ti Kadas, naan-anay ti talek da iti hukbo ken ammo da a ti rebolusyonaryo a tignay laeng ti pudno a mangitantando ken mangbigbigbig iti karbengan da iti daga ken pagbiagan. Isu nga uray nu adda ti sumagmamano a panawen a saan a nakasubli dagiti kakadwa iti lugar, adda pay laeng ti bara ken regta ti panangpasangbay da iti hukbo. Malaksid iti suporta a materyal, maysa ni Manong Nestor ken ti dadduma pay ti nagbalin a sanggiran dagiti kakadwa iti panangsilpo iti dadduma pay a masa, ken nagbalin a kabadang da iti pananganon iti dadduma pay nga ili. **AB**

18.9 milyon

Pilipino ti makunkuna a **"functionally illiterate"** wenno saan a makaawat ti basbasaen da. Pammaneknek daytoy a saan a nasayaat ti kundisyon iti pannakasursuro kadagiti pagadalan gapu ta palalo nga agkurang ti badyet iti edukasyon ken awan ti suporta kadagiti manursuro.



78.7%

ti panaglabsing kadagiti pagallagadan ti eleksyon ket **Red-tagging**.

Nagtaudan: Vote Report PH (Abril 30, 2025)

₱20/KILO A BIGAS

gimik a pinasiklab ni Marcos idi Mayo 1 tapno makaawis ti nayon a botos para kadagiti kandidato na. Naiyatrás gapu ta awan ti naallilaw.



Pope Francis

Disyembre 17, 1936 – Abril 21, 2025

agtawen 88 ni Pope Francis ket pimmusay idi Abril 21, 2025. Binigbig isuna ti Christians for National Liberation kas natured a deboto a nagtarigagay a magun-od ti umili ti sangalubongan ti hustisya.

₱3.1 bilyon

innayon ti NEDA a pondo para iti panangitakder ti **Kaliwa Dam**, iti laksid ti nainget a pammabalaw ditoy dagiti Dumagat-Remontado, tao't simbaan ken dagiti grupo a maka-kalikasan.

63%

nakatennagan ti koleksyon ti estado manipud iti taripa iti bagas gapu iti mandato ti rehimen Marcos nga ibaba daytoy manipud 35% agturong 15%, bayat a saan a signipikante ti panagbaba ti presyo ti bagas iti pagtagilakuan.

14,000

rider ti kumpanya a **Move It** ti agpegpeggad a maawan ti trabaho kalpasan nga imandar ti LTFRB iti kumpanya a kissayan ti bilang dagiti *rider* daytoy.

5 aldaw

laeng nga agbayag ti subsidyo para iti "₱20/kilo a bagas" nu saklawen daytoy ti amin a 27 milyon a mabisbisinan a Pilipino; 3 lawas met nu 5.6 milyon laeng ti agnumar.

Doktrina a CVE ti US, ar-aramaten ti NTF-Elcac

Tunggal adda ti Nalabbaga a mannakigubat ti New People's Army nga agtaud iti sektor ti kabataan-estudyante a matmatay iti labanan (wenno ingagara a patayen) ti Armed Forces of the Philippines (AFP), awan sabali a sangkadagullit ti National Task Force (NTF)-Elcac nu saan a ti pagkasapulan a pawilan ti ideya ken kapanunotan ti kabataan kadagiti unibersidad. Ibagbaga da a wagas daytoy tapno lapdan ti pannakipaset dagiti kabataan iti armado a dangadang wenno aw-awagan daytoy a "radikalisasyon" wenno "terrorist grooming."

Daytoy a taktika ti AFP ken NTF-Elcac ket nagtaud ken nakabalangkas iti doktrina a "countering violent extremism" (CVE wenno "panaglapan iti naranggas nga ekstremismo") ti US. Maaw-awagan nga "ekstremismo" wenno dagiti "napeklan nga ideolohiya" ti anyaman nga ideya a maibilbilang a pangta iti agar-ari a sistema. Ti CVE ket pangkalkalub iti panangpawil iti amin a langa ti panagiyeckas ken panaglapan iti estado. Parparwaren daytoy a ti "ekstremismo" ti mangidurduron iti umili a lumaban kabilang ti lehitimo ken nainkalintegan a panagarmas ti umili laban iti reaksyunaryo nga agar-ari nga estado. Saan a simple nga ideya ken pammati ti mangibungbunga ditoy, kaniwas iti parparwaren ti CVE, nu di ket ti mismo a kongkreto a kundisyon ti panangidadanes, panaggundaway ken kinaranggas ti estado.

Ti doktrina ken programa a CVE

Ti CVE ket umuna a napasingkedan iti sidong ti administrasyon nga Obama ti US idi 2014. Inaramat da daytoy idi panawen ti kampanya a kontra-Muslim wenno panagipasaknap ti Islamophobia, ken kagiddan a pinuntirya dagiti progresibo nga aktibista a pangpulitika. Parparwaren ti doktrina a dagiti Muslim ken dagiti aktibista ket "naranggas iti kaungan."

Naaramat ti CVE para iti panangpulis ken panang-espiya kadagiti lider ti komunidad tapno i-profile wenno mangbukel ti ladawan dagiti indibidwal batay kadagiti tignay da nangruna iti usapin ti relihiyon, puli ken pulitika. Panggep daytoy a bantayan ti "radikalisasyon" dagiti indibidwal a makunkuna a tulbek tapno agtennag

iti "terorismo." Maaw-awagan met daytoy kas "soft counterterrorism."

Uray awan pay ti inaramid ti maysa nga indibidwal, mabalinen a maawagan a "terrorista" ti ugali ken taray ti panagpanunot na. Labsing daytoy kadagiti basaran a karbengan-ao kas ti karbengan iti pribasiya, panagiyeckas, panagtignay, panagorganisa ken dadduma pay. Agimulmula daytoy ti buteng ken agibungbunga ti "self surveillance" wenno "panagbantay iti bagbagi" tapno saan a mapagatapan, kasta met a mangperperdi kadagiti komunidad.

Panagdadael ti CVE iti Pilipinas

Idi 2019, binukel ken pinasingkedan ti gubyrno ti Pilipinas babaen ti Anti-Terrorism Council iti sidong ti Human Security Act ti maysa a National Action Plan on Preventing and Countering Violent Extremism (NAP P/CVE). Nakalanad kas panggep daytoy ti panangimaton kadagiti programa a mangsungsungbat iti pangpulitika, pang-ekonomya, pangkultura, *psychosocial* ken relihiyoso nga aspeto ti "radikalisasyon" nga agtentenag kano iti "naranggas nga ekstremismo."

Kangrunaan a naipasidong daytoy iti panangiwardas ti Department of Interior and Local Government (DILG) kabadang ti dadduma pay nga ahensya ti gubyrno. Tinudo ti plano ti innem a "bulnerable a sektor" a kasapulan a serken tapno malapdan ti "radikalisasyon." Dagitoy a sektor ket ti komunidad, dagiti detenido a pulitikal ken addaan kaso a "terorismo," lider-relihiyoso, unibersidad, agus-u-



sar ti *social media*, *overseas* Filipino workers ken dagiti relihiyoso nga iskolar.

Ti NTF-Elcac ket agak-akem ti mayor a rebbengen kas kangrunaan nga ahensya a koordineytor kadagiti programa a maipatpatungpal iti sidong ti plano. Nakapakete daytoy iti maaw-awagan a "whole-of-nation approach," ti pundasyon ti pannakabukel ti ahensya. Ti NTF-Elcac ti makisarsarita kadagiti klaster ken dagiti pangrehiyon ken lokal a *task force* tapno ipatungpal ti NAP P/CVE.

Iti aktwal, naaddaan sukog ti plano iti panangipatungpal ti Retooled Community Support Program (RCSP) idi Oktubre 2019 iti bileg ti maysa a memorandum ti DILG tapno serken dagiti komunidad. Iti balangkas met ti NAP P/CVE a naipatungpal ti Enhanced Comprehensive Local Integration Program (E-CLIP) idi Marso 2020 tapno puntiryaen met ti "nagsubli (iti salinong ti linteg)" wenno dagiti nakakulong.

Kadagiti unibersidad ken eskwe-laan, agiyar-aramid ti NTF-Elcac ken

Suruten iti panid 10



Barikada ti umili nga Aeta iti Mt. Pinatubo. Nagitakder ti barikada idi Abril 18 ti komunidad ti Aeta iti Mt. Pinatubo ti Sityo Tarukgan, Barangay Santa Juliana, Capas, Tarlac tapno irupir ti karbengan da iti daga da. Manon a tawen a saan a baybayadan nga usto dagiti ahensya ti estado iti turismo dagiti katutubo ken saan met a tultulungan ti NCIP isuda. Saan a nainkalintegang nga inaresto dagiti pulis ti sumagmamano kadakuada ken pinilaan isuda ti kaso nga *obstruction of public passage* ken saan nga awtorisado a panagserrek iti protektado a lugar.

Panagsubli iti trabaho idia Bataan. Naiduron dagiti mangmanged ti administrasyon ti FCF Manufacturing Corporation nga isubli iti trabaho dagiti inpasidong daytoy iti istatus a "forced leave" idi Abril 19. Imawag ti grupo iti kumpanya nga isardeng ti maawawagan a "work speeding" ken dadduma pay nga iskema ti panangiyimbak ti nalpas a produkto gapu ta daytoy ti mangidurduron iti patakaran a forced leave.

Parada iti baybay laban iti offshore wind farm iti Ilocos. Nagisayangkat ti parada dagiti mangngalap iti Pagudpud idia Ilocos Norte idi Abril 20 tapno supyaten ti plano a panangitakder ti BuhaWind Offshore Windfarm iti baybay ti Pasuquin, Burgos, Bangui ken Pagudpud. Iti tallo a tawen a konstruksyon ti *wind farm*, maparitan a makapagkalap asideg ditoy dagiti mangngalap.

Tignay kontra Prime Water idia Bulacan. Nagisayangkat ti noise barrage ti nadumaduma a grupo idi Abril 25 tapno kundenaren ti palpak a serbisyo a danum ti Prime Water iti San Jose Del Monte City idia Bulacan. Manipud iti maitakder ti *joint venture* wenno panagsugpon ti Prime Water ken ti San Jose Del Monte Water District idi 2018, agsusbangiren ti nagbalin a problema dagiti residente kas ti manmano ken nakapsut nga ayus ti narugit ken saan a mabalin nga inumen a danum, ken nangangina a babayadan iti serbisyo.

Dua a lider-masa iti Southern Tagalog, nadukot

NAIMALDIT TI DUA a kaso ti panagdukot kadagiti lider-masa iti Southern Tagalog iti napalabas a dua a lawas. Malaksid ditoy, adda met dagiti panaglabsing iti karbengan-tao dagiti soldado ken pulis idia Isabela, Quezon ken Metro Manila.

Idia Batangas, dinukot dagiti pwersa ti estado ni Pauline Joy Banjanan, organisador ti Kadamay-Southern Tagalog nga agkamkampanya para iti Bayan Muna, idi Abril 26. Dua nga aldaw kalpasan ti panagpukaw, natunton isuna iti istasyon ti pulis iti Santo Tomas, Batangas.

Naamuan a dinukot isuna ti 59th IB, naipasidong iti maysa nga aldaw a tortur sakbay nga inpan da kadagiti pulis. Napilaan ni Banjanan ti kaso nga *illegal possession of firearms and explosives*.

Idia Rizal, pinidot ken inbalud dagiti soldado ti 80th IB ti mannalon a ni Jonathan del Castillo idi rabii ti Abril 27 idia Tanay. Segun iti biktima, naipasidong isuna iti interogasyon ken binutbuteng a patayen isuna dagiti soldado. Inakusaran da a ti awit na a taraon idi kinemmeg da isuna ket ibalon na iti New People's Army (NPA). Pinalubosan laeng isuna ti 80th IB idi parbangon ti Abril 28.

Istraping. Idia Isabela, pinaputukan dagiti elemento ti 502nd IB de ti lima a nailyan a minorya nga Ifugao bayat nga agkalkalap da idi Abril 21 iti Sityo Sapiot, Barangay Tappa, San Mariano. Tallo kadagiti sibilyan ti dagus a natalged a nakaawid bayat a dua ti saan a dagus a natunton. Nagpalto-paltog met ti 86th IB iti Barangay Dicamay Dos, Jones idi Abril 20.

Militarisasyon. Idia Quezon, saan a bumaba iti 2,000 a soldado ti 2nd ID ti naibuyat para iti *focused military operation* (FMO) iti uppat a barangay ti Lopez manipud idi Abril 21. Agsusbangir a tsekpoynt ti intakder dagiti militar ken pulis a nangtantan iti pagbiagan, panagtalon ken nawaya a panaggaraw dagiti residente. Dawdawatan da ti sedula ti amin a dumanan iti tsekpoynt.

Panaglipit. Naharang iti eropuerto ken naparitan a sumrek iti Pilipinas idi Abril 26 ni Gordon Mutch, Amerikano a myembro ti Baltimore Committee for Human Rights in Philippines (BaltCHRP). Immay ditoy Pilipinas ni Mutch tapno agpaliw iti eleksyon 2025 ken makita ti kasasaad dagiti Pilipino iti sidong ti rehimen Marcos. Inbalud isuna ti Philippine Bureau of Immigration iti uppat nga oras, sakbay nga indeport da idia US gapu iti "kontra-gubyrno nga aktibidad na."

Manipud iti panid 9

dagiti ahensya iti seguridad ti estado kadagiti porm, *leadership training*, *camping*, trabaho a kooperasyon ken dadduma pay nga interbensyon kadagiti unibersidad tapno talantanen ti "radikalisasyon."

Maysa a rupa daytoy ti kampanya a *Red-tagging* a mangpawpawil iti wayawaya nga agpanunot, agorganisa, agiyebkas ken dadduma pay a karbengan dagiti kabataan. Adda met dagiti kaso ti panangkumpiskar ti NTF-Elcac kadagiti libro iti librerya dagiti unibersidad a kuna daytoy a mangitungtunda ti "radikalisasyon."

Kakarwan, pagtamtameden ti militar ken NTF-Elcac dagiti administrador dagiti eskwela tapno sumurot iti kumpas da. Iti kastoy a balangkas a sinerrek ti AFP ti maysa a katulagan iti kooperasyon iti University of the Philippines. Daytoy met ti kangrunaan a panggep ti NTF-Elcac idi inpauneg daytoy ti COCOPEA, grupo dagiti pribado nga eskwela, kas paset ti komite daytoy.

Nasaknap a buteng ken troma ti pinataud ti doktrina a CVE iti kabataan ken umili. Gapu ditoy, adu ti aggudeng nga agiyebkas ti upinyon iti *social media* ken agsarita para kadagiti basaran a karbengan da.

AB